

北京日報

第二百一十三册

代表人朱洪

論說

二月二十八日

論許使函阻立憲事

小歐稿

立憲二字自日本譯稱後近日幾成通用名詞其實此中仍大有區別有君主立憲有君民立憲有衆民立憲有聯邦立憲立憲之形式不一立憲之精神不一然大要則天下斷無無憲法之國但君民共守憲法之國其國之政法必平其國之團體必固其國人愛上之心必油然而生其官家任事必有担当而對上不致諂欺對下不敢傲慢其國民之全體對內必知愛國對於外不致生事亦不致渙散其國君得享安樂之福其國運自可延延綿綿億萬斯年此君臣共守憲法之利也若君主專制之國其國亦何嘗無憲法但其憲法專爲治民而設專爲防弊而設不知以一人之心力而求約束乎億萬之人其力必有所不及以一人之精神而求防遏億萬人之弊其疏漏必不能盡彌是故愈求治民而民愈不治愈欲防弊而弊不勝防於是知一人之力未易約束乎億萬人也設官以幫同約束之故遂有約束民之官然而官亦民中之一種耳仍不能無約束也故遂有約束官之官約束愈密弊竇愈多防不勝防遂不能不因陋就簡敷衍形式之治不知以一人約束億萬人何如使億萬人自知約束之爲愈也以一人防億萬人之弊何如使億萬人各共防弊之爲愈也立憲云者是使億萬人各自約束焉已耳是使億萬人共同防弊焉已耳公立憲法一有犯者即爲公衆所不容夫于犯國法尙有可逃若得罪衆人則四顧茫茫已無立足之地故人自不敢爲暴不必防弊而弊自絕此各自約束之理由合同防弊之大法也立憲之利有如此者然此猶不過專從治民防弊一方面言之若夫利于國利于君利于治今日之標利于固萬年之本更有言之而不能盡者夫使立憲而果有害于國無益于君彼外國之君兵強將猛亦何嘗不可用其專制何一國立之于前萬國沿之于後至今日而茫茫大地幾無不立憲之國耶該使臣何不臚陳各立憲國之如何利益及其中多少弊病以相比較而獨沾沾然爲政府疆臣數人慮且何不將今日全球立憲之國與未立憲之國相比較以驗其孰強孰弱孰劣孰優而獨錚錚然慮及民氣之過羣耶夫民氣之羣孰有如倡言革命黨結虛無者然吾見專制國之虛無黨革命黨佈滿國中者有之矣而立憲國之民似較少此黨派也然則民氣孰羣孰不羣耶若謂立憲國



易置政府疆臣如奕棋然夫外國固有易置政府之事然如未立憲之國其如軍機如內閣等大臣亦曷嘗無更調之時豈人人必終于其任耶吾見數千年歷史中固常有因僕從小人之口舌或因一人之喜怒而黜革執政大臣者矣然則不立憲而政府疆臣遂長保其位耶政府疆臣而賢誰肯易置是立憲後而政府疆臣之位乃愈穩固若其不賢則速為易置之正所以有利于君有利于國也何竟不問其人之可否而但慮其易置耶此等言論可以結政府及臣之歡而實未計及乎君國且但知外國有此種民氣而未深究其是否因立憲而羈其不竊謂立憲者則民氣皆不羈否也

譯電

礦工滋擾○西三月十一號路透電云法國(喀里士)礦坑爆發後刻下礦工四萬六千人相率罷工滋擾殊甚俄亂又起○同日又電云波蘭叛亂之事時有所聞日來有愚民聚眾手持兵器擁進瓦梭城(俄之西方大城)劫獄將監犯全行釋放獄卒死者一人傷者二人○又於鐵軌橋下搜出炸藥一百二十磅當時客車軌出軌外罹害者凡五人云

德法對於摩國問題之現況○同日又電云各國代表人在阿爾支士拉士會議摩洛哥國問題法德兩國互觀動靜莫肯先發故現在仍未續行開議云

英太子赴埃及○同日又電云英國(威士路)省皇太子及其后已從(卡拉齊)乘輪前往埃及與論不容烏德○同日又電云大元帥(烏德)在非獵賓宣戰一節刻下華盛頓輿論已表白其殺戮之罪英聘陸軍教習○同日又電云(邊那地亞)君已膺英國陸軍教習之聘歲修六十萬磅

要緊新聞

侍御所見如此○前有某侍御遞一封奏大意謂近來各國喧傳中國有排外舉動以致各邦共起嫌疑推原其故近來各省必有匪徒散布謠言希圖煽惑若不嚴行查禁將恐外交界上大受影響務請飭下京外各省地方文武官弁隨時認真稽察倘有匪徒聚眾立會演說及散布謠言等事立即拿獲首要從重究辦以維邦交而彌隱患等語江西京官對於南昌教案之舉動○南昌教案情形迭紀前報該省京官以此案係胡中丞媚外之舉動所釀成查江令

被戕後王安之猶屢謁撫轅毫無顧忌百姓見王之道遙法外氣懾逼人始激而有此暴動中丞實不能辭其咎聞連日會議聯名奏參請都察院代奏云

戶部各司添設分股事宜○二十四日戶部各堂會議各司添設分股事宜擬令各司印稿司員各就該司事務之繁簡酌量設股若干至添派司員充理正副管股差使除本司掌印主稿印行等員外所有幫稿以下及散走學習等司員均准派充各堂經已畫諾日昨已奉堂諭通飭各司照辦云

警務人員更補○日昨巡警部堂諭通飭內外城總廳署云內城東局總辦榮主事厚現署內城警務處參事所遺東局總辦即派分省補用道唐家楨接充擬撥繙書房津貼及改議叙為保獎○聞某當道擬議以繙書房辦公勤苦擬由吏部餘存項下撥銀二三千兩津貼繙譯各官提調津貼五十金實缺及候補繙譯各員津貼四十金兼差及出差者概不津貼并聞繙書房向例五年請敘現當道亦擬援照出洋繙譯官三年期滿保獎一次之例按屆保獎以示一律而資鼓勵云云未悉果能實行否耳

學部調查內外城學堂現況○日前學部咨行巡警部請通飭各局於內外城所屬地方詳查官立民立各項學堂若干所所有該學堂創辦及執事官紳人等姓氏籍貫學生數目一概造冊彙報本部以憑核辦等因日昨巡警部已據情通飭內外總廳查照辦理矣

天津警務學堂畢業有期○去年秋間袁宮保在津設立警務學堂考取一百五十員分為三班開頭班學員於本年三月即可畢業至招考之期則係本年六月全班畢業後再行定奪云

禁阻美商開設行棧之交涉○湘撫禁阻美商開設行棧美使向外部交涉已記昨報茲聞外部照會美使言長沙城內非必不准美商居住但貝納賜實非安分貿易商民其房主又為鄉人所賤惡故令遷城貿易請飭貴領事與湘撫就近商結云云英使照復以來文既承認洋商有在城內開設行棧之權利如貝納賜有犯事亦儘可由領事與地方官照約會訊云

教士墳山已給印契○美教士購買墳地一案經部電詢湘撫曾否給予印契現據湘撫復電謂湘潭尊道會所買墳山據該縣令電稟業經商之林教士添註公產字樣印契云云

日使附送軍政司書本○營口仁裕商號販運銀元被日軍捕獲充罰當經稟由當道照會日使辯論現據日本內田公



使照復謂奉政府回文此案已屬無可更動附呈軍政司書本查閱便悉云云

## 本京新聞

請阻日軍干預○外務部接奉天將軍電稱日軍在奉天省內干預民政商務捐務等款當即電咨駐日楊星使向日本外務省交涉

外務省交涉

黑龍江將軍奏興築鐵路專電○黑龍江將軍程德全奏請興築江省鐵路奉 硃批該部議奏

黑龍江將軍奏設工藝局專電○黑龍江將軍程德全奏於江省設立工藝局奉 硃批商部知道

奏定駐韓領事署經費○外務部奉旨酌定駐韓總領事署及各口領事署常年經費以韓國漢城原設有總領事一員月准支俸薪銀四百兩惟以駐有使臣一切用項俱由使臣支應今既將使臣裁撤則該總領事責任較重自應酌加俸薪每月准支銀五百兩藉資津貼現在韓國各口原有仁川釜山元山靑州南浦四處領事將來義州開埠亦須增設領事一員所有駐韓總領事署暨五口領事署常年經費擬給銀四萬兩撥由該總領事開支其義州未設領事以前每年給銀三萬六千兩以示限制至該總領事領事及隨員等整裝歸裝並川資仍令查照韓館向來核減成案支報此外一切報銷事宜悉令遵照歷次奏定章程辦理已於日前具奏奉旨允准

准提湖南鹽務陋規與學○湖南學務近年雖頗見整頓惟苦於經費不足迄難擴充改良茲該省留日學生查悉鹽務項下向有陋規為蠹吏中飽已久因繕具呈學部請飭將此項陋規提出專為興學用費日前已由學部允准咨行鄂督湘撫照辦

督湘撫照辦

戶部派查各省幣制人員○聞戶部堂官議擬派熟悉圖法之司員赴各省認真考查圖制實在情形以資整頓幣政茲將考察各員名單開列如左 張茂炯 陳繼訓 張詒 唐瑞銅 彭紹宗 陶仁榮

庚子賠款先還利息條陳○聞有某志士上一條陳於某大臣大旨言庚子各國賠款四萬萬五千兩議定分四十五年清還而此每年一千萬兩之鉅款集之於行省搜之於閭閻雖逼於萬不得已自必飲恨忍痛而如數以償而民人財窮力盡止有此數如復欲於此大賠款再加捐輸敲骨吮血以行新政民力一蹶不振實有可慮者不若宣布各國先將利息一律清還大賠款暫行停止以此每年一千萬兩之鉅款速辦中國各省鐵路及一切五金煤礦不及十年

利源可以富足而此所謂四萬萬五千萬兩之大賠款即可改定還期於十五年後分五年或十年一律清還如此辦法則中國辦理礦務既有的款而利源大興之後提款既易清還亦速實中國之福而亦各國之利也云云

## 各省新聞

自辦鐵路之特色○(直隸)京張鐵路工程前由直督袁宮保派詹觀察天佑專辦全路工程該路計長六七百里所有軌道橋梁購地設站並吸唾嶺鑿山八十餘丈均係詹觀察督率華人認真勘測安辦其工程師以下如鋪土墊木及火車司機駕駛等職均係華人自辦並無一他國人故工料薪水一切均形節省統計全路僅需銀七百萬兩開工不及數月已將自道口至西官門迤北鐵軌鋪竣汽車開行尚便利軌道亦堅固將來各省仿照辦理一體不用外人挽回利源更為不少孰謂華人之不能自行築路也

學部與粵督商緩派遊學生來往電文○(廣東)學部以游學預備科章程現未議定特電粵督緩派送遊學生學部接電後即電復并移咨學務處查照茲將電文抄錄如左

學部來電 選派學生出洋以言語習能直接聽講普通學完備能直入專門者為及格近時論者多主此說前與南北洋鄂粵各省曾議合力設遊學預備科因各省情形不同章程一時未能議定現本部接到各省咨送學生公文仍係絡繹不絕誠恐學力未足人格不齊非但虛耗時光抑且易滋流弊應請轉飭學務處暫緩派送俟商定辦法再為奉達尊處如有擬定妥善章程亦祈賜示以資取則惟遊歷官紳又當別論是否有當統希卓鑒見覆

岑督復電 遣派遊學自應嚴定章程慎選人格乃收實效而杜流弊盡慮極當經咨行照辦仍懇速定辦法仍思干預膏牌費○(廣東)駐廣州英領事照會岑督請停辦膏牌費岑督照復却之已見前報茲英領事堅持前議復照會岑督請停原文錄下 照會事粵省 膏捐一案准貴部堂十二月廿八日復文以酌收膏牌費與舖捐無異難飭停止等由本總領事均已 悉查膏捐未可遽行開辦須俟外務部與本國駐京大臣妥議核奪此言今猶在耳無論改作何名目其真屬屬膏捐不可遽押此事重大本總領事未便擅自允從經將此案詳細情形詳報本國駐京 亞後奪矣為此照會貴部查照可也

日人調查東三省風俗商務○(山東)烟台日本公寓刻擬調查東三省地方人情風俗及商務之實情著為一書各



處人在東三省住過者可備顧問即所到地方之遠近給與酬金其從東省回來而欲到烟台者每百里給川資洋三角到烟台後房屋飲食皆由日本公署供給本人無須花費云

西牢總辦人犯擬由華官檢驗○(上海)新任上海關道瑞華儒觀察接印後曾經面諭各屬員凡地方與利除弊之事及有碍主權之交涉事件不妨直言毋隱以便採用等因聞公麻關刺之司馬因提督橋西牢瘦斃犯人之事時有所聞而捕房從不查照華官遽行收殮未免輕視民命因特詳細稟陳擬請照會領事轉飭工部局及經管西牢之人此後瘦斃人犯須報由華官驗明方可收殮且藉此可以出示曉諭屍屬領回棺木云

畢業生送習海軍○(江甯)南北洋海軍總統薩鎮冰軍門在吳淞創辦海軍學堂規模已具江督周玉帥以金陵水師學堂學生畢業者概難資遣出洋特於本月將該堂畢業生盡數送至上海交軍門分派海軍以資練習飭保民兵輪管帶李田於本月初旬親送該學生等赴滬云

策勵軍人茹苦○(廣東)岑雲帥日前牌示云照得將弁學堂所課學生將為異日充當各營官長之用官長與兵丁必須同甘共苦兵丁所歷之苦官長當先受之始足以振人心勵士氣欲求學生異日能受兵丁之苦此時即宜以待兵丁者相待庶與期望學生之意相背謬將弁學堂學生伙食一項原定每人每月費銀三元五角嗣聞加為四兩五錢經本部堂札飭仍照原意開支據該堂覆稱目下柴米較貴日食三餐月四兩五錢尚係中等伙食等語就學堂一面而論學生清晨即起二更始息三餐飯食必求清潔月中多費數金似無不可抑思學生將來出而赴營充當官長將與兵丁疆場効力艱苦同嘗試以兵丁口糧與學生伙食兩相比較已不免優細懸殊查新章正兵月餉四兩五錢副兵月餉四兩二錢現在新招之兵祇以三兩六錢起餉堂學生於兵事課學尙無成就一月伙食已抵領餉最優之正兵一月口糧撥之事理豈可謂平學生操課兵丁豈係坐食學生非一餐不飽兵丁豈能枵腹從事粵東食物雖貴在營兵丁尚將於月支伙食之外節省餘資寄家用兵丁肯刻苦自勵學生何獨不能豈得謂月中伙食必難減少現應更定章程每人每月給伙食銀三兩永作定額不准擅自加增飯菜但求乾淨清潔足以充飢不必定須肉食倘學生以此為苦則是立志不堅先無軍人資格將來何以涉歷艱苦擔當軍事本部堂於庚子夏間在甘省率師入衛日與士卒相親有時經沙漠瘠苦之區求一簞食而不可得在營困難情形官長與兵丁初無二致幸本部堂久於兵事未嘗以此自苦故知當艱難困苦之際非歷練有素不能卓然自立東西各國學堂均分別收取膳費學費

日本兵隊專習裹糧日以冷飯冷水果腹無非欲習慣勞苦以便行軍凡此規則該學堂均當預為籌及總欲學生舉動可為他日官兵之模範慎勿狃存成見專以優待為籠絡學生之計至在堂人員既與軍事即應以軍人自待更不宜計較飲饌之精醜以自菲薄本部堂現以病久事冗不克時赴各營及各學堂周歷察視公暇當隨時赴營與各學生弁兵會食每念當時入衛情形不敢以食無兼味輒嫌非薄也此外各學堂凡對待學生之處均須預計日後兵隊情形斟酌辦理不得稍有踰越本部堂前辦將弁學堂凡建舍置械以及延聘教習已費鉅金何獨於每月區區伙食靳不增加實欲各學生入苦學界以勵其操持增其志氣為他日共荷艱鉅之根本該堂總辦監督應將此義宣布曉諭俾各學生知所奮勉本部堂實有厚望焉其餘東省文武各學堂學生所有伙食均須以三兩為限向章未及三兩者不必加增如已逾三兩之數概行照減倘辦理人員以為不敷開支即責成該員賠墊不准開報學界均當以忍受艱苦為立志之本否則優饌豐厚志氣頹廢尙何學之足云

中西告示彼此均須蓋字蓋印○(上海)租界章程凡華官所出告示須先赴領事署及工部局簽字蓋印方可發貼而英美工部局所出告示則並未與華官商妥亦未請華官簽字蓋印逕行發貼殊與中國主權有碍聞議員關司馬已將此事詳稟道台瑞觀察請為照會領事轉飭該工部局以後如出告示須先咨照道轅或公廨蓋印方可張貼云

## 各國新聞

中日合同新事業之計畫○(日本)東京函云華商葉子衡氏向有籌集華商資本與日本聯合經營中國新事業之志如絹絲紡績各業現正於各方面從中調查計畫一切日前曾與三井物產會社開會商辦一機關販運中國各省軍營所需槍砲及各省官衙所需之品故葉頃者回滬之際曾向東京之某有力者運動既有成議即當開始經營聞其資本議先籌備二十五萬元將來事業發達再行增加總行設於上海另於神戶設一分行並聘長子莊氏襄理業務因北京大員各省官吏均頗熟悉也聞神戶之分行大半即就葉之住宅開設云

東報記中俄前密約之內情○(日本)北京來電云俄國對於中國之要求乃以昔年與道員周冕所結密約為根據該約明俄國在黑龍江全省有採掘礦山及其他各種之優等權利俄國目下之占領觀音巖及鐵康(譯音)河



等處之礦山及占領黑龍江沿岸之礦區數處而不交還中國乃遵照此密約之手段也又自團匪事變後俄國遠東總督阿力克塞夫曾與前奉天將軍增祺訂結條約十二款其內載明中國承認俄國在全部滿洲有訓練華兵及由中俄兩國合辦礦山等事業及俄國有優先之權利若中國欲開放口岸則須先與俄國商議但此等條約當時未由中國政府承諾並由中國政府電命駐俄華使胡惟德向俄政府交涉破壞該密約嗣公使即以該約為根據另與俄國政府締結條約十款但此約亦未經中國政府承認者也俄國撤兵問題為日俄戰爭之原因之一也俄國現尙主張此密約為有效之說向中國要求北滿洲之權利北京外交界咸以俄國此等舉動為不然而大憤慨俄國之橫暴譯大阪朝日新聞

第二西伯利亞線○(俄國)俄國政府業已決定敷設第二西伯利亞線其本線在於延長現今之西伯利亞鐵道從斯土利敦斯克向沿海州一帶接續烏蘇里線而線路總沿黑龍江之水流不離俄領其終點達海參威此路一至竣工之日則與滿洲鐵路之競爭其關係非淺鮮矣(按斯土利敦斯克為西伯利亞外貝克爾省之都市當尼布楚之東北五十英里沿上阿木河之要港也有病院及各種製造所其地用德語之猶太人最占多數一九零一年始開通為西伯利亞鐵道路道之要驛

俄國設置貨棧○(俄國)據伯林電俄國商務省與俄國大商家共同協議就滿洲南部地方設置貨棧多所云

## 調查

日本三十九年分歲入歲出總豫算表

(續)

學生費	二〇四〇六四
萬國學術協會費	四三九八
高等學校大學預科入學試驗諸費	六八六三
共計	四〇五〇七六
震災豫防調查會	一四四四
修繕費	一
死傷給賜費	一

賠償及訴訟費  
調查費

一八〇八二  
共計一九五二八

測地學委員會

修繕費  
死傷給賜費  
賠償及訴訟費  
調查費

一〇〇  
二  
七八二一  
共計七九二四

中央氣象臺

俸給及諸給  
廳費

一三八三一  
一七四三三

修繕費

一三八五

死傷給賜費

一

賠償及訴訟費

二

旅費

二五五九

雜給及雜費

八八六五

委託電報料

五七八一

計四九八五七

## 事件

中國各省鐵路辦法撮要

留學美國胡棟朝撰



近五年來我中國人士研究鐵路問題者雖不乏人然以我中國之大鐵路之多人亦似乎尙少既少則不能不開築遲  
慢開築既慢則中國振興之機又阻滯也況乎各省所議鐵路章程皆言大概其於工程實事似離題尙遠歷觀江西全  
省鐵路總局開辦簡明章程新甯鐵路公司辦理善後章程浙江全省鐵路議畧四川旅滬紳商會議川漢鐵路事畧其  
中定名宗旨目辦法籌款等章似尙明晰而如何開築與辦仍未提及至其包工承辦之說雖乃不得已之苦衷辦法  
然非用中國工程師則雖名為自辦而將來必無自辦之實權非先派學生出洋遊學則雖欲聘中國工程師而將來斷  
無中國工程師以待用伏望當道三致意焉予畢業後游歷鐵路橋樑局廠業經半載其工程實事皆身履目睹今不揣  
固陋援擬川漢鐵路撮要辦法而以浙江全省鐵路模仿之他省與辦亦以此類推其或有小補也

擬川漢鐵路撮要辦法

里數

川漢鐵路由成都起點經行資城而達於重慶復由重慶經行忠城夔州而達於宜昌復由宜昌經行沙市而達於武昌  
按圖測量約計八百英里以一英里合華三里三計之全路共長二千六百四十里

浙江全省鐵路當以杭州為中心點分幹路四枝第一枝由杭州經行嘉興而達於上海約計一百二十英里第二枝  
由杭州北上直達蘇州約計八十英里第三枝由杭州南下直達衢州約計一百一十五英里第四枝由杭州經行紹  
興甯波而達於溫州約計二百四十二英里合共四百六十七英里以華里伸之全路共長一千五百四十一里較之  
川漢鐵路約短一半故集資本購物料比之川路當減一半

需款

每里鐵路需款項實難預定蓋高山平地處處不同開洞架橋情形各異非實地測量難知價值也然查考已成鐵路  
所需費用按其里數而分之所得均數亦畧可知其大概矣查粵漢鐵路已築成一小段長二十三英里一二五其所消  
實數七十五萬八千一百八十六元均而計之每里需用美金三萬二千七百餘元然美國工程師不諳中國情形不免  
有浮消之舉或間從中漁利豈能無過額之需故此數目略覺其高余悉心考求推算研其物料價值究其工人薪水苟  
以我國自辦每里鐵路需用款項約在美銀萬二千五百元伸計華里每里費用應需華銀一萬一千兩嘗查北省  
鐵路其估價售款每以一萬兩為率未免過低抑徒以其大數推算耶

浙江鐵路川漢鐵路皆然其餘各省鐵路亦然

籌款

今以每里需銀一萬一千兩計之川漢全路當預籌款項二千九百零四萬兩雖然開築鐵路漸續而成故所籌款項亦  
宜漸續而備非謂即時籌備二千九百餘萬也

一擬第一年築路一百六十五里當籌備款項一百八十一萬五千兩

一擬第二年築路八百二十五里當籌備款項九百零七萬五千兩

一擬第三年築路一千六百五十里當籌備款項一千八百一十五萬兩

此等款項當貯存銀行以便應支蓋定購材料先交半價職員工役薪水局廠經費使用須隨時支給也

浙江全省鐵路當預籌款項一千六百九十五萬一千兩

一擬第一年照川漢鐵路開築一百六十五里當籌備款項一百八十一萬五千兩

一擬第二年照川漢鐵路開築八百五十里當籌備款項九百零七萬五千兩

一擬第三年築路五百五十一里當籌備款項六百零六萬一千兩

此等款項當貯存銀行以便應支

我中國於實業界上較之各國雖平在後故興築鐵路愈速愈佳愈先愈妙是以川漢鐵路浙江鐵路開辦第一二年其  
籌款若干萬與築若干里均當一樣也其餘各省亦宜迅速開辦興築以先開車通往來為至計也

用人 未開辦以前

一擬籌撥的款立派出洋學生十六人前往美國肄習鐵路工程以備五六年後充當養路工程師之職約計每人每年  
學費美金九百元伸計華銀每年共需學費銀二萬零八百兩蓋今日中國各省自辦鐵路在在需材而中國工程師無  
多苟非先儲人材他日斷不敷所用間或有之其薪金必昂故派人肄習以備所用較為省費也

浙江鐵路若能照辦固佳不然擬派十二人每年需用學費銀一萬五千六百兩其餘各省亦然鐵路長里數多者照  
例加增惟鐵路短里數少者不得照例除減

一擬籌撥的款立招鐵路學生一百二十名專學測量軌道繪畫路線以備一二年後充當測量繪畫置橋安軌各職擬



聘總教習一名月薪二百兩正教習四名每名月薪一百五十兩若有華人能膺其任者固當延聘然現在學堂初興能  
斯任者尙難其人不得已而用洋人則美國人較宜擬聘助教習八名每名月薪一百兩統計每年應用經費銀一萬  
九千七百兩此等學生半工半讀當給月薪以資鼓舞復以年數遞計教習亦然皆當作爲鐵路公司人員以期盡職余  
入鐵路局廠及橋 局廠均見青年小子造工其間其作工也日則幫助操作夜則領受工課如算學繪圖文理之類且  
每月得英金十四元至三十五元不等公同延聘教習學童不納修金其教習或有由公司職員充當者然必另給薪金  
以專責成中國各省自辦鐵路需材孔亟宜師其法

浙江鐵路苟能照辦固佳不然擬聘總教習一名正教習三名助教習六名招鐵路學生九十名每年需用經費銀一  
萬五千兩其餘各省亦然鐵路長里數多者照例加增鐵路短里數少者不得照例除減

開辦第一年

一擬聘總工程師一名總理全路工程事宜約給月薪四百兩須以華人充當以免利權外溢

一擬聘佐理工程師一名佐理測量建築事宜約給月薪二百五十兩

一擬聘幫工程師二名充當工程儀司管理工程隊事宜每人月薪二百兩

一擬聘幫工程師二名充當平水儀司管理平水隊事宜每人月薪一百八十五兩

以上人員均要大學堂畢業學士方許充當然今日中國鐵路初興鐵路人才尙鮮擬暫用美國工程師或用日本工程  
師亦可將就惟日本現時鐵路工程尙在幼稚學業亦然不如雇用美國人之爲愈也

一擬聘幫工程師二名充當打手每人月薪一百七十兩

一擬聘幫工程師二名充當前量手每人月薪一百六十兩

一擬聘幫工程師二名充當後量手每人月薪一百五十兩

此三項人員均要鐵路學堂畢業生方許充當然今日中國鐵路學堂寥寥無幾由此畢業者尙少擬暫由公司所招  
鐵路學生充當造工半日讀書半日或造工半月讀書半月因平時地而定總期不碍於工程不荒於書課爲合宜每  
學生每月宜酌給薪水三十兩不分何職役薪金一律支給以免畸輕畸重然其職役可隨時調換悉遵工程儀手平  
水儀手二工規師指揮辦理

一擬雇用旗手二名每人每月薪金三十兩

一擬雇用斧手四名每人每月薪金三十兩

此兩項人員或以學生充當或雇用平常工人充當亦可平水儀司一人打手一人斧手一人合成一隊名曰平水儀  
隊測量地之高下工程儀手一人量手二人旗手一人斧手一人合成一隊名曰工程儀隊測量地之遠近線之曲直

兩隊統計八人合成一隊名曰鐵路工程隊三個月內聘用工程人員十八人

一擬三箇月之後添聘副工程一名佐理總工程師司督辦一切工程事宜約給月薪三百五十兩

一擬添聘佐理工程師一件月薪二百五十兩

一擬添聘鐵路工程隊二隊月人月薪如前

三箇月內聘用工程人員一十八名連上共計三十六名

一擬六箇月之後添聘分段工程師二名管理分段一切鐵路事宜而總工程師督理之每約人給月薪三百兩

一擬添聘佐理工程師二名每人月薪二百五十兩

一擬添聘鐵路工程隊四隊各人月薪如前

六個月內聘用工程人員三十七名連上共計七十三名

開辦第二年

一擬添聘分段工程師四名每人月薪三百兩

一擬添聘佐理工程師四名每人月薪二百五十兩

一擬添聘鐵路工程隊八隊各人月薪如前

是年聘用工程人員七十二名連上共計一百四十五名

開辦第三年

一擬添聘佐理工程師八名每人月薪三百兩

一擬添聘鐵路工程隊十七隊各人月薪如前

是年聘用工程人員一百四十四名連上共計三百八十九名分計由大學堂出身工程師九十一名鐵路學生一百



二十名平常工人七十八名此開辦三年所用工程人員之大畧情形也  
浙江全省鐵路開辦第一二年所用工程人員擬悉照川漢鐵路辦法惟第三年擬添聘鐵路工程隊六隊佐理工程  
三名統計兩年半聘用工程人員一百九十六名其餘各省鐵路應照此例類推辦理

### 宮門抄

二月二十七日刑部 都察院 大理寺 兩紅旗值日無引 見 貴賜謝授浙江紹興府知府 恩 麒德謝署缺  
恩 榮肇定壽預備 召見 肅王請假五日 桂公續假十日  
召見軍機 貴福 榮肇 定壽

### 上諭

二月二十七日奉

上諭袁世凱奏參庸懦不職各員一摺直隸容城縣知縣劉寅才具謁賦粉飾欺朦濫安縣知縣孔憲廷暱比劣紳縱容  
丁役署阜城縣知縣候補知縣冬之陽識見猥瑣操守平常開缺另補知縣凌洪才聽斷糊塗釀成人命候補知縣章  
承肅怠惰因循辦事廢弛留直補用知縣寶琳志氣萎靡任意玩忽候補知縣金祖祺庸惰性成不知檢束均着即  
行革職肅甯縣知縣孫天運性涉疏懶以下稍寬昌縣知縣陸保善才欠開展用人不慎均着開缺另補另片奏順  
天武清縣知縣項壽堃性情貪鄙惟利是圖紳民捐助學堂經費格外需索又出禁賭為名任意苛罰魚肉平民實屬  
貪墨不職著革職發往軍台効力贖罪以示懲儆餘著照所請辦理該部知道欽此

### 批摺摘由

二月二十五日摺片三十八件

延祉奏續舊搶劫盜犯請入原案核議 該衙門議奏 又扎薩克輔國公因病給假派員署理 該衙門知道 袁世  
凱奏請以天津守凌福彭等調補保定府等缺 吏部議奏 又牛莊海關及奉天島關洋稅收支 該部知道單併發  
又請以兵部郎中席淦留直差遣 着照所請該部知道 又請北洋收勸餉捐人員立案請獎 該部議奏 又請

將弁學堂經費改充陸軍各學堂經費 該部知道 岑春煊奏盤驗藩庫銀數及通省錢糧完欠各數 戶部知道  
又二十九年分支過餉糧草數目 該部知道 又二十九年分錢糧比較完欠分數 戶部知道單併發 又各  
年舊欠正雜錢糧已未完數目 戶部知道單併發 又二十九年錢糧奏銷已未完分數 該部議奏單併發 誠勳  
奏查明上年半年釐金收數 戶部知道單併發 又抽收蕪湖米係借餉需償款無從提解 戶部知道 又陳頃信  
等命案審擬 刑部議奏 又上年各州縣已未結交代彙奏 戶部知道單併發 又匯解甘肅第二期協餉 戶部  
知道 又重解俄法英德賠款 該部知道 張晉奏奏三十一分冬漕起運變通裝袋 該衙門知道 又解地丁  
京餉 該部知道 又甌海關百八十一結徵收華洋稅鈔 該部知道 又甌海關百八十一結徵收洋藥釐金數目  
該部知道單併發 又報解三個月浙東釐金數目 該部知道 又請以世善署署杭州等守 吏部知道 又請  
以李輔耀署杭嘉湖道 吏部知道 錫良奏解頭批京餉 戶部知道 又冬令調署委署及實缺到任回任 吏部  
知道單併發 又匯解新定四川賠款 戶部知道 又解部京餉 戶部知道 又匯解頭批補辦洋款磅價 該部  
知道 胡廷幹奏貴谿縣民邵林禾長等命案彙奏 刑部議奏 又拏獲橫年各匪分別懲辦 該部知道 又犯婦  
楊蕭氏越獄拏獲 該部知道 楊士驤奏請襲世職 兵部議奏單併發 王昆請以增春坐補四旗佐領 著照所  
請該衙門知道 馬進祥交卸鎮篆 知道了 何鑑署鎮篆日期 知道了 太常寺奏祭先農壇行禮奉 旨欽此

### 奏稿

湖南巡撫臣龐鴻書跪 奏為實缺候補總兵先後積勞成疾傷發病故懇 恩賜卹恭摺仰祈 聖鑒事竊臣據  
湘陰縣知縣杜鼎元 據在籍前鎮中營游擊藍廷青等呈稱已故湖南永州鎮總兵熊鐵生歿年七十歲湘陰縣人於  
咸豐六年投入靈軍轉戰鄂贛皖粵等省洊保提督並奮勇巴圖魯名號光緒九年經前兵部尚書彭玉麟札調委帶湘  
軍慶左營駐紮廣東沙甯防堵築礮臺十五年回籍省親二十年奉 旨飭派統帶鐵字五營北上隨經湖廣總督張  
之洞奏奉 諭旨准令添足十營遂即成軍由鄂次第開赴山海關旋因親督營哨日夜巡防復感海風潮逆奉發舊  
傷加勢垂危請假回籍奉 旨允准二十三年六月初七日奉 上諭熊鐵生著補授湖南永州鎮總兵二十五年  
經前湖南巡撫俞樾 奏委統帶勁字新軍二十六年因病請假交卸營務經湖廣總督張之洞奏准開缺回籍調理於



三十一年正月初九日因舊傷舉發在籍病故又據長沙縣知縣徐本麟詳據在籍翰林院編修蕭榮爵等呈稱已故閩浙補用總兵郝長慶歿年六十三歲係長沙縣人于咸豐六年投入霆軍轉戰甯皖江粵各省並隨前陝甘總督左宗棠勦辦新疆回匪保總兵暨赴勇巴圖魯名號光緒二十年經前閩浙總督譚鍾麟委統礮隊兼統字營堵截海口修築划秋山上下各砲台酷暑嚴寒親巡督率因勞甚觸發舊傷不時吐血至二十八年四月十八日在途病故先後詳請 奏咨議卹前來臣查該故員等俱從戎日久迭克名城力疾從公不辭勞瘁均因傷發在籍在途病故殊堪憐惜近年歲缺候 促鎮積勞傷發病故迭經疆臣奏奉 諭旨優卹今該總兵等事同一律合無仰懇 天恩 准敕部將 故永州鎮總兵熊鑑生閩浙補用總兵郝長慶均照軍營立功後積勞病故例議卹生平戰績 宣副史館立傳已彰等而勸勵戎行出自 逾格鴻慈除將履歷事實分案咨送部外理合恭摺具 奏伏乞 皇太后 皇上聖訓示謹 奏奉 硃批著照所請該衙門知道欽此

楊士驥片 再時事艱艱百度具舉百款奇絀其屬於新政者固宜銳意擴張而關乎國之大計民之利病者臣不敢辭迂泥之名而不一盡其責查北運河自南漕改折以來糧艘不行河道淤塞幾如平陸論者多謂鐵路輪船交通便利漕運既停運河儘可緩修不必糜此無用之款豈知運河上接清江下達臨清縣長千有餘里江河商賈藉以流通兩岸民田資其灌溉北運河一段實全河之樞紐亦即漕運之命脈庚子之役海道梗阻上海招商局積存漕米三十萬石悉改由運河北上迨議約稍有眉目始商准由商局輪船再由津鐵路轉運至京而運脚之昂耗米之鉅為歷來所未有臣曾隨議京約諸所目擊即當時在事臣工不知費幾許經營而後運京之米到倉無虧到口之米有所存蓄昭然往事殷鑒難忘現在南運河河身尚屬通暢僅北運河二百餘里淤墊失修譬如咽喉梗塞全體脈絡為之阻滯非特商民運真不通萬一每運未便仍用舊法轉輸何以備緩急而維大局目下淤墊未久修治尚不甚為難擬請將北運河淺阻處所分段挑挖墾墾開墾酌量修復並添修涵洞引導附近水源以期一律深通舟行無阻無事之時以便商民有事之時以資轉運現已檄飭總辦臨清關道員吳震澤會同東昌府知府魏家驊臨清直隸州知州張承燮就近勘估擬辦由東昌至臨清一段九十餘里先行挑修其上段之百餘里俟下段工竣再行接辦所需經費即在藩庫歷年運河大挑項下核實酌提用事竣咨部報銷不必另請專款以節餉項臣為慎重河工綜籌時局起見是否有當謹附片陳明伏乞 聖訓示謹 奏奉 硃批著照所請該部知道欽此